

## Fógra Poiblí

### An tAcht um Pleanáil agus Forbairt 2000 (arna leasú)

FÓGRA RÚIN CHUN ATHBHREITHNIÚ A DHÉANAMH AR PHLEAN FORBARTHA CHATHAIR NA GAILLIMHE 2017-2023 AGUS CHUN PLEAN FORBARTHA CHATHAIR NA GAILLIMHE NUA 2023-2029 A ULLMHÚ

Tugtar fógra leis seo, de bhun Alt 11 den Acht um Pleanáil agus Forbairt 2000 (arna leasú), go bhfuil sé i gceist ag Comhairle Cathrach na Gaillimhe, an tÚdarás Pleanála don Chathair, athbhreithniú a dhéanamh ar an bPlean Forbartha Cathrach 2017-2023 agus Plean Forbartha Cathrach nua a ullmhú dá cheantar feidhme don tréimhse 2023-2029.

Tá an Plean Forbartha Cathrach straitéiseach chun críocha na gcuspóirí agus na mbeartas a fhorbairt chun straitéis a sheachadadh i gcomhair pleanáil cheart agus forbairt inbhuanaithe na cathrach agus i gcomhair Croístraitéise. Tabharfar san áireamh freisin oibleagáidí reachtúla aon údaráis áitiúil sa cheantar agus aon bheartais nó cuspóirí ábhartha an Rialtais nó aon Aire Rialtais san am i láthair.

#### **Measúnacht Straitéiseach Comhshaoil agus Measúnú Cuí**

Déanfaidh an tÚdarás Pleanála Measúnacht Straitéiseach Comhshaoil (SEA) mar chuid den phróiseas athbhreithnithe i gcomhréir leis na Rialacháin um Pleanáil agus Forbairt (Measúnacht Straitéiseach Comhshaoil) 2004 (I.R. Uimh. 436/2004) (arna leasú). Chun na críche seo, ullmhóidh an tÚdarás Pleanála Tuarascáil Chomhshaoil ar na tionchair dhóchúla a bheadh ar an gcomhshaoil dá gcuirfí an plean nua i bhfeidhm. Beidh feidhm freisin ag forálacha Airteagail 13C go 13J de na Rialacháin um Pleanáil agus Forbairt (Measúnacht Straitéiseach Comhshaoil) (Leasú) 2004 (I.R. Uimh 436 de 2004).

Déanfaidh an tÚdarás Pleanála Measúnú Cuí (AA) i gcomhréir le hAirteagal 6 den Treoir maidir le Gnáthóga 92/43/ECC. Déanfar Scagadh Chéim a hAon don AA mar chuid den phróiseas foriomlán agus déanfar na céimeanna eile den AA ina dhiaidh sin, más gá.

#### **Comhairliúchán Poiblí**

Reáchtálfar an chéim chomhairliúcháin poiblí seo roimh an dréachtphlean idir Déardaoin an 7 Eanáir 2021 agus Dé hAoine an 5 Márta 2021 (an dá lá sin san áireamh).

Mar bhuntaca leis an bpróiseas seo, tá cáipéis um chomhairliúchán poiblí ina dtarraingítear aird ar roinnt de na saincheisteanna straitéiseacha don chathair ar fáil le hamharc uirthi agus lena híoslódáil ó [www.galwaycity.ie](http://www.galwaycity.ie). Beidh sonraí maidir le tuilleadh rannpháirtíochta a tharlóidh i rith an phróisis chomhairliúcháin ar fáil ar shuíomh gréasáin agus ar mheáin shóisialta na Comhairle Cathrach.

Tá cóip chruas den cháipéis um chomhairliúchán poiblí ar fáil ar iarratas freisin ón Rannóg Pleanála agus is féidir amharc uirthi ag oifigí na Rannóige Pleanála ach coinne a dhéanamh (Guthán: 091 536 599).

#### **Aighneachtaí/breithnithe**

Tá aighneachtaí/breithnithe maidir leis an athbhreithniú ar Phlean Forbartha Chathair na Gaillimhe reatha 2017-2023 agus ullmhú Phlean Forbartha Chathair na Gaillimhe nua 2023-2029 agus/nó an próiseas SEA/AA á lorg ó bhaill an phobail agus ó pháirtithe leasmhara eile.

Dírítear sa chéim seo den phróiseas ar shaincheisteanna straitéiseacha le cabhrú chun creat a chur ar threo ginearálta an chéad Phlean Forbartha Cathrach eile. Sa chomhthéacs seo, ní féidir breith a dhéanamh ar thograí ná ar iarratais maidir le criosú tailte áirithe. Beidh deis ann aighneachtaí a dhéanamh níos deireanaí sa phróiseas, lena n-áirítear aighneachtaí maidir le criosú.

Spreagaimid an oiread daoine, grúpaí pobail, agus páirtithe leasmhara agus is féidir chun aighneacht/breithniú a dhéanamh. Spreagtar go háirithe leanaí, nó grúpaí a dhéanann ionadaíocht ar son leasa leanaí, le páirt a ghlacadh.

Is féidir aighneachtaí/breithnithe a dhéanamh trí:

- Leas a bhaint as an tairseach aighneachta ar líne ag [www.galwaycity.ie/development-plan-2023-2029](http://www.galwaycity.ie/development-plan-2023-2029)
- Trí ríomhphost chuig [devplan@galwaycity.ie](mailto:devplan@galwaycity.ie).
- Tríd an aighneacht/breithniú a phostáil chuig **An Pleanálaí Sinsearach, An Rannóg Pleanála, Halla na Cathrach, Bóthar an Choláiste, Gaillimh, H91 X4K8.**

Ná déan aighneacht/breithniú ach ar bhealach amháin le do thoil i.e. ar líne, trí ríomhphost nó trí chóip chrua ar an bpost. Ba cheart go mbeadh **Athbhreithniú ar an bPlean Forbartha** mar theideal ar aighneachtaí/breithnithe agus ba cheart go mbeadh d'ainm, seoladh agus nuair is cuí an comhlacht nó eagraíocht a bhfuil ionadaíocht á déanamh agat ar a son le haon aighneacht nó breithniú.

**Is é Dé hAoine an 5 Márta 2021 an dáta deiridh chun aighneachtaí / breithnithe a chur isteach.**

Cuirfear san áireamh gach aighneacht /breithniú a chuirtear isteach laistigh den tréimhse chomhairliúcháin thuas agus an Plean Forbartha Cathrach nua á ullmhú. Tabhair faoi deara nach féidir breith a dhéanamh ar aighneachtaí /breithnithe atá deireanach.

Dá mba mhaith leat tuilleadh rannpháirtíochta a bheith agat sa chomhairliúchán poiblí seo, déan teagmháil le Foireann an Phlean Forbartha trí ríomhphost [devplan@galwaycity.ie](mailto:devplan@galwaycity.ie) nó ar an nGuthán-091 536599.

Mar gheall ar an bpaindéim reatha agus na riachtanais le cloí le prótacail um shláinte phoiblí, d'fhéadfadh srian a bheith ar chruinnithe duine le duine. Ar mhaithe le sábháilteacht an phobail agus na foirne, iarrann an Chomhairle Cathrach go gcloítear leis na srianta atá i bhfeidhm i gcás go ndéantar coinne duine le duine.

### **Cosaint Sonraí**

Tabhair faoi deara go bhfoilseofar gach aighneacht/breithniú bailí a fhaigheann an Chomhairle ar shuíomh gréasáin Chomhairle Cathrach na Gaillimhe agus go mbeidh siad mar chuid de Thuarascáil an Phríomhfheidhmeannaigh maidir le haighneachtaí/breithnithe a fuarthas agus tagrófar dóibh / áireofar iad i miontuairiscí chruinnithe na Comhairle.

Tá Comhairle Cathrach na Gaillimhe faoi réir riachtanas an Achta um Shaoráil Faisnéise 2014, an Achta um Chosaint Sonraí 2018, agus an Rialachán Ghinearálta maidir le Cosaint Sonraí (GDPR). Ní phróiseálfar sonraí ach de réir na reachtaíochta thuasluaite. Is féidir teacht ar an Ráiteas Príobháideachais maidir le bainistíocht aighneachtaí a dhéantar i rith an phróisis chomhairliúcháin poiblí seo anseo ar an Tairseach seo – <https://www.galwaycity.ie/planning-privacy-statement> Tá beartas príobháideachais Chomhairle Cathrach na Gaillimhe ar fáil anseo - <https://www.galwaycity.ie/privacy-policy>.

Sínithe:

**Ruth McNally,**  
**Stiúrthóir Seirbhísí, Iompar,**  
**Pleanáil, Forbairt Fisiciúil agus Acmhainní Daonna.**